

Visoki predstavnik se zalaze za BiH u Švicarskoj

Početkom ove sedmice Visoki predstavnik, Wolfgang Petritsch, je održao govor na petoj Konferenciji Vlade Švicarske o saradnji sa Istocnom Evropom, posvećenoj temi: *"Pet godina nakon Dayton: Bosna i Hercegovina – Sta čini Švicarska?"* Među velikim brojem sudionika bili su i švicarski ministar vanjskih poslova, Joseph Deiss, i ministar za ekonomska pitanja, Pascal Couchepin, zatim koordinator Pakta o stabilnosti za pitanja izbjeglica, Hans Koschnick, ministrica za evropsku integraciju Bosne i Hercegovine, Biserka Turkovic, bivši ombudsmen za Bosnu i Hercegovinu, Gret Haller, kao i mnogobrojni biznismeni i zvaničnici iz same Švicarske. Konferencija je privukla veliku pažnju u toj zemlji.

Švicarska je angažirana u Bosni i Hercegovini u velikoj mjeri. BiH je zemlja koja je dobila najveći procenat švicarske pomoći upućene Centralnoj i Istočnoj Evropi u periodu od 1996. do 1999. godine – 235 miliona CHF ili 304 miliona KM od ukupno 580 miliona CHF ili 750 miliona KM. Visoki predstavnik se zahvalio Vladi Švicarske na njenom *"uzornom angazmanu"* i apelirao da nastavi sa pružanjem pomoći Bosni i Hercegovini. Izložio je svoju strategiju sa akcentom na povratak izbjeglica, ekonomskoj reformi i izgradnji države i rekao da je napredak postignut, iako ne u onoj mjeri u kojoj se očekivalo. *"Moj rad u Bosni može biti frustrirajući, što na koncu često i jeste"*, izjavio je Visoki predstavnik. *"Ali s druge strane, ne bih vam se obraćao da ne vjerujem da pred tom zemljom stoji budućnost u Evropi. Vjerujem da mnogi od vas mogu uticati na tu budućnost samim dolaskom i investiranjem u Bosnu i Hercegovinu, bez obzira da li će to biti u Sarajevu ili u drugim dijelovima zemlje. Kada se osvrnem na ogromne prepreke koje smo uspjeli savladati poslije rata, nalazim opravdanje kako za svoj, tako i za angazman cjelokupne*

medjunarodne zajednice.“

Visoki predstavnik je takodje govorio o predstojecim izborima, kao i na sansu koju izbori pružaju u pogledu još jednog koraka ka boljoj budućnosti. *“Može se osjetiti da je stanovništvo sve manje i manje zainteresovano za nacionalističku retoriku“,* rekao je Visoki predstavnik. *“Stanovništvo traži odgovore na urgentna pitanja iz svakodnevnog života: zaposlenje, plaće, obrazovanje djece, redovne isplate penzija. Odgovorni i savjesni neće ostvariti nadmoćnu pobjedu na izborima narednog vikenda, ali se promjena mogla osjetiti već nakon općinskih izbora u aprilu. Svi projekti bi se mogli realizirati daleko brže da oni koji u BiH donose odluke imaju političku volju za jačanjem države“.*

Visoki predstavnik je održao odvojene razgovore sa ministrom vanjskih poslova, Deissom i ministrom za ekonomska pitanja, Couchepinom. Konferencija je bila popraćena svim glavnim švicarskim novinama, uključujući i Neue Zürcher Zeitung.